

## ‘U SIMINATURI

A primu sulì, a ‘mmienzu ê surca, è sulu,  
comu fu sulu Ddiu,  
cuannu ntô cielu ‘u munnu siminàu:  
E, sutta ô cielu, ora, ‘u so travagghiu,  
sapi ri terra e sapi ‘i sacramientu.

Sacuennu ‘a broscia scurri lu so viaggiu,  
ccâ coffa appisa e avanza a passu lientu:  
Avanti ‘n passu e spanni ‘n pugu ‘i ranu;  
n’ autru passu e n’ âtru pugu abbola,  
e r’ogni passu, rapiennu la manu,  
‘a terra abbinirici senza stola.

Ora, cc’ aratu, torna e arritorna,  
scriviennu ntê surca l’ antica vintura:  
“L’ uomu cchê figghi allonca li so jorna,  
e cchê sciuri si aterna la Natura.”

Duòppu, ccâ zappa, firisci ‘i taffuna  
e, mentri ccâ manu accarizza la cija,  
”Sti cuccidda -cci rici -ora bbi rugnu,  
ma milli spichi mi rati ntâ gghiugnu”,  
e, abbucatu, ‘i vuòrrica cchê ita,  
siennu ‘a morti ‘a simenza ppi la vita.

Ccussì va ‘n juornu rô siminaturi,  
‘n puocu criatu e ‘n puocu criaturi.  
E, ‘a sira, ‘u sulì, cuannu s’ agghiacuna,  
ppi premiu ci lassa unu rê so raja,  
ca ci va appriessu, cantu cantu,  
comu se ‘u ssicùta ‘u Spiritu Santu.